

Cuspair Clàir-ghnothaich	7
Àir. Aithisge	G/20/21

## COMHAIRLE NA GÀIDHEALTACHD

<b>Comataidh:</b>	<b>Comataidh na Gàidhlig</b>
<b>Ceann-latha:</b>	<b>16 Dùbhlachd 2021</b>
<b>Tìotal Aithisge:</b>	<b>Cunntas às Ùr air Foghlam Luchd-ionnsachaidh na Gàidhlig agus Foghlam tron Ghàidhlig</b>
<b>Aithisg le:</b>	<b>Àrd-Oifigear Gnìomhach, Coileanadh agus Riaghlachas</b>

### 1. Adhbhar/Geàrr-chunntas Gnìomhach

- 1.1 'S e adhbhar na h-aithisge seo cunntas às ùr a thoirt do Bhuill thaghte mu fhoghlam Gàidhlig (Fileantaich) agus Gàidhlig (Luchd-ionnsachaidh) ann an Comhairle na Gàidhealtachd.
- 1.2 Tha an aithisg seo cuideachd a' toirt fios às ùr do Bhuill mun t-suidheachadh a thaobh nam prìomh raointean leasachaidh làithreach is teachdail a chuireas taic ri fàs ann am Foghlam Gàidhlig ann an Comhairle na Gàidhealtachd. Bidh seo a' cumail ri prìomhachasan bunaiteach Plana na Gàidhlig 3 agus builean Tabhartas Sònraichte na Gàidhlig.

### 2. Molaidhean

- 2.1 Thathar ag iarraidh air Buill:
  - i. Beachdachadh air an aithisg agus toirt fa-near dhan àrdachadh ann an àireamhan nan sgoilearan thar solar Foghlam tron Ghàidhlig agus Foghlam Gàidhlig anns a' Ghàidhealtachd; agus
  - ii. Toirt fa-near do na raointean leasachaidh làithreach is teachdail ann am Foghlam, a' gabhail a-steach an adhartais ann am pròiseas Co-chomhairle Sgìrean-sgoile FtG.

### 3. Buaidhean

- 3.1 Goireas – Tha na buaidhean air goireasan taobh a-staigh a' phrìomh bhuidseit làithrich a tha a' gabhail a-steach Tabhartas Sònraichte na Gàidhlig, Maoin Taic

Covid, Bòrd na Gàidhlig, agus Maoin Buileachaidh Achd na Gàidhlig (Bòrd na Gàidhlig).

- 3.2 Laghail – Tha e mar riathanas air Comhairle na Gàidhealtachd am Plana Gàidhlig aice a bhuileachadh fo Achd na Gàidhlig (Alba) 2005.
- 3.3 Coimhearsnachd (Co-ionannachd, Bochdainn, Dùthchail agus Eilean) – Tha an aithisg a’ cumail ri poileasaidhean co-ionannachd Chomhairle na Gàidhealtachd.
- 3.4 Atharrachadh Gnàth-shìde/Carbon Ciallach – Tha Sgioba na Gàidhlig an-ceartuair a’ frithealadh nan coinneamhan uile air-loidhne is gu bhiortail, mar sin a’ lùghdachadh feum air siubhal airson gnothachas.
- 3.5 Cunnart – Tha an cunnart ìosal agus a’ cumail ri stiùireadh làithreach nàiseanta agus stiùireadh làithreach Chomhairle na Gàidhealtachd a thaobh Covid-19.
- 3.6 Gàidhlig – Tha an aithisg a’ neartachadh leasachadh na Gàidhlig taobh a-staigh sgìre Chomhairle na Gàidhealtachd agus a’ toirt taic do bhith a’ buileachadh Plana na Gàidhlig.

#### **4. Pròiseactan Leasachaidh is Taic Foghlaim**

- 4.1 Tha oifigearan foghlaim a’ leantainn air adhart a’ toirt seachad taic is leasachadh gu ruige nam prìomhachasan ann am Plana Gàidhlig Chomhairle na Gàidhealtachd agus air raon iomairtean a chur air dòigh gus taic a chur ri bhith a’ libhrigeadh Foghlam Gàidhlig agus Foghlam tron Ghàidhlig. Tha eisimpleirean air an toirt seachad gu h-ìosal.
- 4.2 Oideas – Tha pròiseact com-pàirteach ro-innleachdail air a bheil Oideas a-nis a’ dol air adhart agus tha e ri fhaotainn gu nàiseanta thar grunn ùrlaran sna meadhanan. ’S e sreath de phod-chraolaidhean mu Fhoghlam tron Ghàidhlig a th’ ann agus chaidh a chur air bhog san t-Sultain. Às dèidh co-obrachadh eadar Sgioba Gàidhlig na Comhairle agus Sgioba Foghlam Teagaisg SMO, chaidh am pròiseact a chruthachadh airson taic a thoirt do thidsearan le cothrom ceangal a thogail tro na meadhanan sòisealta is didseatach.
- 4.3 Anns gach pod-chraoladh, tha Gwen Culbertson a’ bruidhinn ri eòlaichean àrd-sgoile no bun-sgoile mun dreuchd, na dùbhlain is na fuasglaidhean as fheàrr an lùib a bhith ag obair ann am FtG. Bidh na ceistean sna pod-chraolaidhean ag amas air leasachadh proifeiseanta airson a bhith a’ teagasg oileanach is thidsearan. ’S e fìor dheagh chothrom a th’ anns a’ phod-chraoladh airson neach sam bith aig a bheil ùidh ann am Foghlam tron Ghàidhlig airson èisteachd ri tidsearan is eòlaichean a’ meòrachadh is a’ deasbad. Tha SMO air na pod-chraolaidhean a shanasachd ann an dòigh èifeachdach, a’ cleachdadh nam meadhanan sòisealta fo shuaicheantas Oideas le taic didseatach bho meadhanan TELT.
- 4.4 Tha Oideas ag amas air smaoineachadh ùr a bhrosnachadh, ceistean a thogail is fiosrachadh a cho-roinn eadar tidsearan Gàidhlig aig a bheil na h-aon dùbhlain sna seòmraichean-teagaisg aca. Tha pod-chraolaidhean ceangailte [an seo](#).

Chithear eisimpleir dhen iomairt air na meadhanan sòisealta gus ìomhaigh a' phròiseict seo a thogail ann an **Eàrr-ràdh 1**.

- 4.5 Sgoil nan Goireasan Gàidhlig / Gaelic Content Creating School Scheme  
'S e prìomhachas a tha seo a tha air a chomharrachadh ann am PnG3 fo Chuspair 3 – A' Ghàidhlig ann am Foghlam, agus tha toradh puing 3.5 ag aithris gum bu chòir do dh'Fhoghlam: *'Ath-sgrùdadh a dhèanamh air na stuthan ionnsachaidh is na goireasan ionnsachaidh a tha air an toirt seachad gus taic a chur ri foghlam Gàidhlig, le amas taic a thoirt do luchd-obrach na Gàidhealtachd ann a bhith a' co-roinn ghoireasan taobh a-staigh ùrlar didseatach.'*
- 4.6 Airson taic a chur ris a' phrìomhachas seo, tha Acadamaidh Bhiortail na Gàidhealtachd air taic dhidseatach a thoirt do dh'Fhoghlam Gàidhlig tro Hub Sgoiltean Didseatach na Gàidhealtachd. Thathar a' moladh leasachadh ùr gus co-obrachadh a bhrosnachadh eadar sgoiltean gus dileab a' Hub a chumail a' dol. 'S e pròiseact a tha seo air a bheil Sgoil nan Goireasan Gàidhlig (SNGG) agus 'Gaelic Content Creating School' sa Bheurla. Chaidh seo a chur air bhonn airson co-obrachaidhean a bhrosnachadh gus goireasan a cho-roinn le chèile.
- 4.7 Gheibh sgoiltean a ghabhas com-pàirt sa phròiseact ìre duaise a rèir na chuireas iad a-steach de ghoireasan. Bheir seo còir dhaibh na logothan agus an tìotal 'Sgoil nan Goireasan Gàidhlig' a chleachdadh. Tha seo ag aithneachadh na tha iad a' cur ris a' bhanca ghoireasan agus a' comharrachadh an cuid co-obrachaidh.
- 4.8 Chaidh molaidhean a dhèanamh gum biodh goireasan didseatach agus stuthan a ghabhadh luchdachadh a-nuas luachmhor dha-rìribh agus gum faodadh iad a bhith air an co-roinn tro phortal Foghlam tron Ghàidhlig air Hub Didseatach na Gàidhealtachd.
- Tha sgoiltean mar-thà air goireasan a cho-roinn gus an urrainn do chàch an cleachdadh agus thèid brosnachadh a bharrachd a thoirt do dhaoine eile com-pàirt a ghabhail fhad 's a bhios am pròiseact a' leasachadh is a' dol air adhart.
- 4.9 Faic **Eàrr-ràdh 2** airson postairean a chaidh a cho-roinn le tidsearan FtG uile anns a' Ghàidhealtachd.

## 5. **Cunntas às Ùr mu Cho-chomhairlean Sgìrean-sgoile**

### 5.1 Sgìrean-sgoile Foghlam tron Ghàidhlig

Mar a chaidh a chomhairleachadh roimhe, tha an Stiùireadh Reachdail air Foghlam Gàidhlig a' moladh gum bu chòir do dh'ùghdarrasan ionadail sgìrean-sgoile FtG a stèidheachadh airson sgoiltean a tha a' tabhann FtG. Tha stèidheachadh sgìrean-sgoile FtG fo ùmhlachd co-chomhairle reachdail fo Achd nan Sgoiltean (Co-chomhairleachadh) Alba 2010. Tha na h-eacarsaichean seo a' cur feum air mòran ghoireasan, chan ann a-mhàin do Chomhairle na Gàidhealtachd, ach cuideachd do dh'Fhoghlam Alba, a dh'fheumas Neach-sgrùdaidh a chur an dreuchd airson gach moladh a mheasadh. De na 20 bun-sgoiltean anns a' Ghàidhealtachd a tha a' tabhann FtG, chaidh 11 sgìre-sgoile FtG a chruthachadh, le co-chomhairle an-dràsta ga dèanamh air trì molaidhean a bharrachd. Tha an suidheachadh mu dheireadh a thaobh gach eacarsaich làithreach air a mhìneachadh gu h-ìosal.

## 5.2 Bun-Sgoil Bhaile Ùr an t-Slèibh

Dhùin a' cho-chomhairle phoblach air 3 Sultain 2021, le ceithir freagairtean air am faotainn. Thàinig an aithisg aig Foghlam Alba a-steach air an 30 Sultain. Tha oifigearan an-dràsta a' beachdachadh air na freagairtean, le dùil gun tèid aithisg dheireannach airson co-dhùnadh a thoirt seachad do Chomataidh an Fhoghlaim air 24 Gearran 2022.

## 5.3 Bun-Sgoil Àth Tharracail

Dhùin a' cho-chomhairle phoblach air 8 Dàmhair 2021. Chaidh 13 freagairtean fhaotainn, ged a chaidh aon a-steach às dèidh dhan cheann-latha airson ùine na co-chomhairle tighinn gu crìch. Thathar an dùil ris an aithisg bho Foghlam Alba a dh'aithghearr. Tòisichidh oifigearan a' beachdachadh air na freagairtean an uair sin, le dùil aithisg dheireannach a chur a-steach gu Comataidh an Fhoghlaim.

## 5.4 Bun-Sgoil Ghlinn Urchadain

Thòisich a' cho-chomhairle phoblach air 29 Samhain 2021 agus thèid i air adhart gu 4 Gearran 2022.

## 6. **Dàta Sgoilearan 2021 / 2022**

6.1 Gach bliadhna, bidh Sgioba na Gàidhlig a' dèanamh modh-sgrùdadh air dàta àireamhan sgoilearan is luchd-obrach ann an solar FtG agus FLG ann an sgoiltean air feadh na Gàidhealtachd.

Tha an dàta air a mhìneachadh sa chlàr ann an 6.2 gu h-ìosal. Tha seo a' sealltainn gu bheil àireamhan a' fàs anns gach roinn de dh'Fhoghlam Gàidhlig. Tha e na adhbhar misneachd a bhith a' faicinn àireamhan Tràth-ionnsachaidh is Cùraim-chloinne (TCC) a' meudachadh 7.82% às dèidh an lùghdachaidh a chaidh a chlàradh an-uiridh.

Tha an dàta TCC a chaidh a chruinneachadh a' riochdachadh clann a chaidh a chlàrachadh bhon Lùnastal. Bidh clann a' dol a-steach às ùr gu TCC trì tursan thar an t-seisein. Thathar an dùil gun tig àrdachadh air an àireimh iomlain seo às dèidh nan clàrachaidhean san Fhaoilleach is sa Ghiblean.

## 6.2 **Àireamhan sgoilearan thar TCC FtG, Bun-sgoil, Àrd-sgoil, Cuspairean Àrd-sgoile tron Ghàidhlig agus Luchd-ionnsachaidh Gàidhlig san Àrd-sgoil:**

Bliadhna	Sgoilearan Sgoil-àraich/ Ionadan Com-pàirteach FtG	Sgoilearan Bun-sgoile FtG	Sgoilearan Àrd-sgoile Gàidhlig Fhileanta	Sgoilearan Àrd-sgoile Cuspairean tron Ghàidhlig	Sgoilearan Àrd-sgoile Luchd-ionnsachaidh Gàidhlig
2016-17	264	896	343	265	1,829
2017-18	287 Suas 8.01%	923 Suas 2.93%	341 Sìos 0.59%	259 Sìos 2.32%	2012 Suas 9.10%
2018-19	307 Suas 6.51%	963 Suas 4.15%	373 Suas 8.58%	282 Suas 8.16%	1,887 Sìos 6.62%
2019-20	320 Suas 4.06%	1,034 Suas 6.87%	388 Suas 3.87%	261 Sìos 8.05%	2,131 Suas 11.45%
2020-21	283 Sìos 13.07%	1,058 Suas 2.27%	414 Suas 6.28%	286 Suas 8.74%	2,208 Suas 3.49%
2021-22	307 Suas 7.82%	1,082 Suas 2.22%	438 Suas 5.48%	287 Suas 0.35%	2,204 Sìos 0.18%

6.3 Mar a chaidh aithris do Chomataidh an Fhoghlaim san t-Samhain, tha àireamhan sgoilearan Luchd-ionnsachaidh Gàidhlig nas àirde sa Ghàidhealtachd na ann an àite sam bith eile san dùthaich.

A rèir dàta sgoilearan Bhòrd na Gàidhlig, tha 61% de Luchd-ionnsachaidh na Gàidhlig ann an àrd-sgoiltean ann an sgoiltean na Gàidhealtachd. Gheibhear ceangal gu aithisg Chomataidh an Fhoghlaim an seo:

[Aithisg Ghàidhlig Chomataidh an Fhoghlaim](#)

Tha an clàr gu h-ìosal a' sealltainn gu bheil an dearbh àireamh de Luchd-ionnsachaidh Gàidhlig Àrd-sgoile sa Ghàidhealtachd air fàs gach bliadhna, thairis air na trì bliadhna mu dheireadh, agus tha seo ann an co-theacsa gu bheil àireamh luchd-ionnsachaidh na Gàidhlig thar Alba air fad a' lùghdachadh ann an 2020/21. Mar sin, tha suidheachadh na Gàidhealtachd eucoiltach ris a' phàtran nàiseanta. Tha an reata fàis thar an tràth seo cudromach cuideachd. Gu nàiseanta, tha na h-àireamhan air fàs beagan a bharrachd air 10% thar Alba air fad, an coimeas ris a' Ghàidhealtachd far a bheil àrdachadh 17% air a bhith ann.

Luchd-ionnsachaidh Gàidhlig Àrd-sgoile	2018/19	2019/20	2020/21
Iomlan Alba BnaG	3266	3605	3599
Luchd-ionnsachaidh Gàidhlig sa Ghàidhealtachd	1887	2131	2208
% Luchd-ionnsachaidh Gàidhlig sa Ghàidhealtachd	58%	59%	61%

#### 6.4 Buileachadh Sgoilearan

Chaidh fiosrachadh mu bhuileachadh sgoilearan airson Gàidhlig (Luchd-ionnsachaidh) agus Gàidhlig (Fileantaich) Ìre 4-6 a thoirt gu coinneamh mu dheireadh Comataidh na Gàidhlig san t-Sultain. Bha seo a' sealltainn gun robh fàs san àireimh sgoilearan a bha a' soirbheachadh an dà chuid ann an Teisteanasan Albannach Gàidhlig (Luchd-ionnsachaidh) agus Gàidhlig (Fileantaich). Chan eil inneal tomhas-measaidh air-loidhne Riaghaltas na h-Alba – *Insight* – air a dhol beò ann an ùine airson cunntas a thoirt dhan chomataidh seo. Mar sin, chan urrainnear fhathast coimeasan a dhèanamh eadar dàta buileachaidh SQA na Gàidhealtachd agus dàta ùghdarrasan eile is tomhaisean nàiseanta àraid. Thèid tuilleadh fiosrachaidh a thoirt do Chomataidh na Gàidhlig nuair a bhios dàta ri fhaotainn bho *Insight*.

Gheibhear ceangal gu aithisg Comataidh Gàidhlig an t-Sultain an seo:

[Aithisg Foghlaim Chomataidh na Gàidhlig](#)

#### 6.5 Far a bheil solar FLG thar na Gàidhealtachd

Tha Foghlam Àrd-sgoile Luchd-ionnsachaidh Gàidhlig ri fhaotainn anns na h-àrd-sgoiltean a leanas:

Acadamaidh Alanais, Àrd-Sgoil Àird nam Murchan, Àrd-Sgoil Bhaile Theàrlaich, Acadamaidh Allt a' Mhuilinn, Acadamaidh Chùil Lodair, Acadamaidh Inbhir Pheofharain, Acadamaidh Dhòrnaich, Àrd-Sgoil Farr, Àrd-Sgoil Gheàrrloch, Acadamaidh Rioghail Inbhir Nis, Àrd-Sgoil Cheann Loch Liobhann, Àrd-Sgoil Loch

Abar, Àrd-Sgoil Mhalaig, Àrd-Sgoil a' Phluic, Àrd-Sgoil Phort Rìgh, Acadamaidh Rìoghail Bhaile Dhubhthaich, Àrd-Sgoil Ullapuil.

## **7. Prìomh Eileamaidean de Leasachadh Foghlaim ann am PnG3 agus Pròiseactan Tabhartas Sònraichte na Gàidhlig**

7.1 Tha paidhleat a' dol air adhart le Acadamaidh Bhiortail na Gàidhealtachd airson taic a chur ri Gàidhlig ann am Foghlam Coitcheann Farsaing. Tha Gàidhlig a-nis air a libhrigeadh tro theagasg air-loidhne do 2 x clasaichean ÀS1 agus 2 x clasaichean ÀS2 ann an Àrd-Sgoil Cheann Loch Lìobhann airson luchd-ionnsachaidh Gàidhlig.

Thathar a' libhrigeadh leasan seachdaineach airson gach clas air-loidhne a' cleachdadh Google Classrooms agus tha an obair air fad air a crìochnachadh tro Google Suite. An-dràsta, tha 25 sgoilear ann an ÀS1 agus 28 sgoilear ann an ÀS2 a' faighinn Gàidhlig Luchd-ionnsachaidh. Tha an leasachadh seo a' cur gu dìreach ri gealladh PnG3: 'Gun leasaichear Foghlam Gàidhlig 3–18 tro dhòigh-obrach eagarach is sheasmhach gus àrdachadh a thoirt air an àireimh de Luchd-ionnsachaidh Gàidhlig ann an ionadan'.

Thèid còmhraidhean a chumail mu bhith math dh'fhaodte a' leudachadh libhrigeadh FLG taobh a-staigh sgoiltean eile. Bidh ceanglaichean gu na dùbhlain GLEANS cuideachd a' brosnachadh thidsearan Nuadh-Chànanan Àrd-sgoile gus a' Ghàidhlig a libhrigeadh mar chànan a bharrachd no mar phàirt de Ionnsachadh Eadar-chuspaireil – Cuspairean Sòisealta: Na Fuadaichean, Na Seumasaich is eile.

7.2 Thèid trèanadh pròbhaidh 1+2 a thoirt seachad cuideachd dhaibhsan a tha a' teagasg taobh a-staigh sgoiltean Gàidhlig Cànan 2 (C2) agus Cànan 3 (C3). 'S e seisean maidne air-loidhne a bhios an seo agus thèid seiseanan às dèidh sgoile a chumail às dèidh làimhe airson taic a thoirt seachad is sunnd a chumail suas. Tha ceanglaichean gu goireasan air-loidhne agus seiseanan trèanaidh clàraichte air am foillseachadh tro làrach-lìn Ionnsachadh Proifeiseanta Fad Dhreuchd 1+2 na Gàidhealtachd gus an urrainn do neach sam bith a chaill seisean, coimhead air a-rithist. Bidh sgoiltean a tha a' libhrigeadh Gàidhlig mar C2 agus C3 a' leantainn air adhart a' faighinn taic le cùrsaichean trèanaidh a bhios air an sanasachd agus bidh cùrsaichean fèin-ionnsachaidh air-loidhne air an comharrachadh do thidsearan a bhios airson an sgilean cànan Gàidhlig fhèin a leasachadh. Bithear ag amas san t-seisean seo air sgoiltean a dh'iarr taic tro shuirbhidh 2021 Riaghaltas na h-Alba.

7.3 Tabhartas Sònraichte na Gàidhlig *Pròiseact 3 – Gàidhlig ann an Tràth-Ionnsachadh is Cùram-chloinne, Foghlam Bun-sgoile is Àrd-sgoile:*

Tha an iomairt seo a' coimhead ri bhith a' planadh is a' buileachadh, le luchd-ùidh is com-pàirtichean, cothroman airson leasachadh proifeiseanta leantainneach, ag obair le coimhearsnachdan nan sgoiltean againn agus àrd-mhanaidsearan solar FtG taobh a-staigh sgoiltean gus dèanamh cinnteach gu bheil sinn a' freagairt air na feumalachdan aca, ag obair le ùghdarrasan eile nuair a tha sin a dhìth.

7.4 Tha eisimpleirean de dh'obair leasachaidh làithreach sna raointean seo mar a leanas:

- Thèid tachartasan lionrachadh didseatach a cho-òrdanachadh le Sgioba na Gàidhlig airson tidsearan bun-sgoile, àrd-sgoile is pròbhaidh FtG thar na Gàidhealtachd airson ceangal a thogail às ùr le co-obraichean. Tha seo gu

h-àraid cudromach do thidsearan a tha air tighinn dhan Ghàidhealtachd às ùr no a tha ag obair ann an sgoiltean dùthchail.

- Chaidh dà sheisean air-loidhne a chumail air an t-seisean seo agus thathar an dùil gun tèid ceithir seiseanan eile a chumail thar an dà theirm a tha air thoiseach. Chaidh foirmichean a chur a-mach gu luchd-obrach a' sireadh mholaidhean airson chuspairean is raointean de dh'ionnsachadh proifeiseanta, agus thèid seo a chleachdadh airson stiùir is structar a thoirt do na seiseanan a tha ri thighinn. Bidh na tachartasan lìonrachaidh seo nam bun-stèidh airson tachartasan Ionnsachadh Proifeiseanta Fad Dhreuchd san àm ri teachd, air an stiùireadh leis na còmhraidhean is fiosrachadh mu na tha a dhìth. Tro bhith a' co-roinn deagh chleachdadh le co-obraichean, bidh cothrom luachmhor ann sgilean is eòlas thidsearan a cho-roinn cuideachd.
- A' co-roinn deagh chleachdadh le co-obraichean FtG thar na Gàidhealtachd, a' còmhradh is a' brosnachadh a bhith a' cruthachadh ghoireasan air-loidhne, a' cur ri ceistean sgrùdaidh air buileachadh poileasaidh is goireasan, mar a thathar a' mìneachadh ann am PnG3.
- Chaidh grunn Thinglinks a chruthachadh airson grunn chuspairean curraicealaim. 'S e goireas air-loidhne a tha seo a tha a' gabhail a-steach cheanglaichean dìreach (putain) gu diofar ghoireasan (Faic **Eàrr-ràdh 2**), làraich-lìn chuspaireil speisealta, bhidiothan YouTube, bhidiothan teagaisg agus gnìomhan a ghabhas luchdachadh a-nuas agus a dh'fhaodas tidsearan a chleachdadh gus taic a chur rin cuid teagaisg. Tha cuid de shusbaint SNGG cuideachd air a cho-roinn air na Thinglinks seo a bharrachd air a' Hub Didseatach. Tha na goireasan seo co-fhreagrach ri feumalachdan sònraichte tron bhliadhna agus 's e inneal feumail a th' annta airson fiosrachadh a chruinneachadh ann an aon àite.
- Tha Cèilidh Nollaige air-loidhne air dòigh airson an 10 Dùbhlachd am-bliadhna agus bidh grunn ionadan Foghlam tron Ghàidhlig a' ceangal tro choinneamh air-loidhne agus a' craoladh beò gu ionadan eile le bhith a' seinn laoidhean Nollaige is a' cluiche ceòl. Thàinig seo gu bith mar thoradh air iartas bho Cheannardan-sgoile na h-ùrlaran didseatach a chleachdadh gus coimhearsnachdan sgoile a cheangal ri chèile. Bidh seo mar phàirt de leasachadh a bhrosnaicheas a bhith a' cleachdadh innealan air-loidhne a leithid Google Suite airson taic a chur ri ionnsachadh thar na Gàidhealtachd.
- Tha leasachadh eile san amharc airson Teirm 3, far am bi Bun-Sgoil Ghàidhlig Phort Rìgh agus Bun-Sgoil Ullapuil a' gabhail pàirt ann an ionnsachadh co-roinnte is leasan air-loidhne air an libhrigeadh mar cho-phròiseact. Bidh na tidsearan mu seach a' libhrigeadh teagasg air-loidhne do sgoilearan bhon dà sgoil agus a' tighinn còmhla airson bruidhinn mu adhartas is airson na h-ath cheumannan a chur air dòigh. Bhiodh am pròiseact seo na mhodail airson tuilleadh leasachaidh ann an sgoiltean eile.

Faic **Eàrr-ràdh 2** airson tuilleadh fiosrachaidh mun dòigh sa bheil na pròiseactan seo air an cur air adhart taobh a-staigh sgoiltean le solar Gàidhlig sa Ghàidhealtachd.

Ainmeachadh: Kate Lackie, Àrd-Oifigear Gnìomhach airson Coileanadh agus Riaghlachas

Ceann-latha: 1 Dùbhlachd 2021

Ùghdar: Lena Walker, Oifigear Taic Foghlaim  
Ruairidh MacAoidh, Oifigear Leasachaidh Foghlaim

# Oideas

FOGHLAM TRO MHEADHAN NA GÀIDHLIG

● CUR AIR BHOG

**30.09.21**

Pod-chraolaidh ùr mu fhoghlam  
tro mheadhan na Gàidhlig.

● Agallamhan le sàr-eòlaichean  
foghlam na Gàidhlig!  
Eòlas, beachdan is cnuasachadh!



SABHAL  
MÒR OSTAIG

Ionad Nàiseanta Cànan is Cultar na Gàidhlig



The Highland  
Council  
Comhairle na  
Gàidhealtachd



Appendix 2

**COFAIDH IS CÒMHRADH**

## CÒMHRADH AIR-LOIDHNE

Thigibh còmhla air-loidhne, air cùisean FtMG gus ur beachdan a lorg...

Chan e tachartas foirmeil a tha seo, 's bidh cuspairean diofraichte againn rin deasbad gach turas...

**DIARDAOIN 02/12**  
Tidsearan Bun-sgoile  
15.30 - 16.30

**DIARDAOIN 09/12**  
Tidsearan Àrd-sgoile  
15.30 - 16.30

Quinnibh's koraibha-steach am form-fics againn!

Brìog air na cinn-là airson googlemeeet fhosgladh

**Umha** **U** **SGOIL NAN GOIREASAN GÀIDHLIG**  
10 Goireas FtG air an co-roinn  
Teisteanas umha air a thoirt seachad  
Logo umha air a thoirt seachad  
Eilias £10 air a thoirt seachad

**Airgead** **A** **SGOIL NAN GOIREASAN GÀIDHLIG**  
20 Goireas FtG air an co-roinn  
Teisteanas airgid air a thoirt seachad  
Logo airgid air a thoirt seachad  
Eilias £20 air a thoirt seachad

**Òr** **O** **SGOIL NAN GOIREASAN GÀIDHLIG**  
30 Goireas FtG air an co-roinn  
Teisteanas òir air a thoirt seachad  
Logo òir air a thoirt seachad  
Eilias £30 air a thoirt seachad

FAODAR LOGOTHAN SNGO A CHLEACHDADH AIR SOIDHNEADH POST-D, BONN DHULLEAGAN-LÌN, IS EILE

THA SINN A' SREACHD COMPLEAN DE GOIREASAN FIOR NHIATH, AIRSON LITEARRAS DISEATACH, STEIN IS KL, A THA SINN TOLLAICHTE A CHO-RÒNN THAR NA BÀIDHEALTAICH

UIDHEANAN-TAICE AIRSON TEAGAS DISEATACH:

- TAGSEANADH PAPERPOINT
- THINGLINKS
- LÀRACH GOOGLE

UIDHEANAN-TAICE AIRSON HRISACHADH SÒGLEARAN:

- DEANACHÈAR
- GOIREASAN EADAR-OBRAICHAEL

Thòisich na goireasan Thinglink tron ghlasadh ann an 2020. Tha iad air an cumail taobh a-staigh Hub Sgoil Dhìseatach na Gàidhealtachd agus faodar stuthan ùra a chur riutha aig òm sam bith.

Si = Seallaidhean Iomlan - Àir, sheallaidhean an chaidh a chruthachadh.  
SM = Seallaidhean as Motha - Àir, sheallaidhean ann an aon latha.

**Staitistearachd Thinglink**  
**THINGLINKS**  
Thinglink Statistics

 SI/TV: 507 : SM/MV: 65	 SI/TV: 1080 : SM/MV: 448	 SI/TV: 147 : SM/MV: 27
 SI/TV: 443 : SM/MV: 48	 SI/TV: 540 : SM/MV: 52	<p>The Thinglink resources started during lockdown in 2020. They are hosted within the Highland Digital School Hub and new materials can be added to them at any time.</p> <p>TV = Total Views - No of views since it was created. MV = Most Views - No of views in a single day.</p>
 SI/TV: 199 : SM/MV: 64	 SI/TV: 212 : SM/MV: 60	

**Cèilidh NA NOLLAIGE!**

SEINN! CEOL!

GLÈDH AN DÈ...  
**DIHAOINE 10MH AN DÙBHLACHD @ 10M**  
A bheil geansaidh Nollaig oirbh?

PRESS CTRL KEY AND CLICK ON EACH IMAGE TO SEE FULL VERSION